

Tanda taubat diterima, hati sudah tawar untuk mengulangi dosa

SOLUSI

PANDUAN
HIDUP
BERSYARIAT

2012 | PP 15048/05/2013 (032162) |

MOTIVASI · FARDUAIN ·


ISU No.

46

Kisah Labu dan Butang Baju

Anas bin Malik r.a. menceritakan: "Seorang tukang jahit mengundang Rasulullah s.a.w. menghadiri satu jamuan yang hidangan tersebut dimasak sendiri olehnya. Saya menemani Rasulullah s.a.w. menghadiri jamuan tersebut. Tuan rumah mendekatkan kepada Baginda s.a.w. roti serta kuah berisi labu dan daging. Saya melihat Baginda mencari-cari labu di dalam mangkuk tersebut. Maka sejak itu saya menyukai labu."

Selanjutnya di hlm. 67



> Syukur Kita Dapat Melihat

hlm. 92

> Rujuk Melalui SMS?


hlm. 76

> Catatan Rihlah di Bumi al-Quds

hlm. 32

> Allah Takdirkan Saya Buat Maksiat? hlm. 101

Taubat sebelum Terlambat



Orang yang boleh segera bertaubat

hanyalah orang yang merasakan keagungan Allah, takut kepada-Nya dan mengharapkan keampunan-Nya. Bukan kerana takut penyakit, atau sudah tidak berupaya atau tidak bertenaga, atau untuk selamat daripada dipenjarakan atau takut dihukum, tetapi taubat yang ikhlas semata-mata kerana Allah.

ISSN 1985-5400

46

RM 10.00 (SEM)
RM 12.00 (S/S)
SGD 7.50
BND 7.50
USD 10.00
EUR 8.00
IDR 35,000.00
AUD 7.50



TELAGA BIRU SDN. BHD.



AUDIT BUREAU OF CIRCULATIONS
(Incorporated in Malaysia)



Imbas kod
untuk ke
Facebook
Majalah
Solusi





Kehebatan dan Kecemerlangan Personaliti al-Siddiq

GAMBAR: HIASAN

Tatkala Rasulullah s.a.w. dalam kesusahan, dialah yang membantu Baginda. Tatkala Baginda dalam kesedihan, dialah yang menggembirakan. Tatkala Baginda menyatakan sesuatu perkara, dialah yang sentiasa membenarkannya. Inilah personaliti hebat bergelar al-Siddiq.

Al-Siddiq bererti membenarkan. Inilah sifat yang ada pada insan bernama Abu Bakar atau nama sebenarnya Abdullah bin Uthman bin 'Amir bin 'Amru bin Ka'ab bin Sa'ad bin Taym bin Murrah bin Ka'ab bin Lu'ay al-Qurashi al-Taymi. (*Tabaqat Ibn Sa'ad*, jil. 3, hlm. 125-126)

Beliau merupakan seorang sahabat yang paling akrab dengan Rasulullah s.a.w. Peribadinya terserlah melalui sifat pemalu, tegas, pengasih, pemurah dan bersih daripada noda jahiliah dan kegelapan. Dialah teman Rasulullah s.a.w. yang mengakui Baginda tidak pernah berdusta kepada manusia lain lantaran sifatnya yang jujur dan amanah.

Sayidina Abu Bakar al-Siddiq merupakan salah seorang sahabat yang dijamin masuk syurga oleh Rasulullah s.a.w. Jaminan ini berdasarkan kehebatan personaliti dan pengorbanannya yang terus-menerus mempertahankan Islam sehingga ke penghujung kehidupannya.

Suatu hari, Abu Bakar bertanya kepada Rasulullah s.a.w.: "Adakah terdapat seseorang yang dipanggil dari semua pintu syurga?" Baginda s.a.w. lantas menjawab, maksudnya: "Ya. Aku berharap engkau lahir salah seorang daripada mereka wahai Abu Bakar." (Riwayat al-Bukhari, no 3666 dan Muslim, no. 1027)

Personaliti Unggul

Insan yang berjaya selalunya mempunyai kualiti diri yang unggul. Personaliti Abu Bakar yang hebat telah melayakkannya menjadi khallifah pertama selepas Rasulullah s.a.w. wafat. Apakah rahsia kecermerlangan pemilik gelaran al-Siddiq ini?

1. Mulia dan hebat semasa jahiliah

Kehebatan Sayidina Abu Bakar terserlah sebelum beliau memeluk Islam lagi. Antara kemuliaan dan kehebatannya ialah:

i. **Akhlik baik.** Abu Bakar seorang lelaki yang disukai dan disayangi oleh kaumnya kerana mempunyai akhlak yang baik,

ii. **Ahli perniagaan yang hebat.** Beliau juga merupakan seorang yang pakar dalam perniagaan di samping sikapnya yang peramah dan mudah bergaul dengan masyarakat pada ketika itu.

iii. **Kenal susur-galur kaumnya.** Selain itu, beliau ialah orang Quraisy yang

paling mengetahui nasab Quraisy serta kebaikan dan keburukan kaumnya.

iv. Mengharamkan arak. Walaupun minuman arak merupakan satu kebiasaan bagi masyarakat jahilliah, namun beliau telah mengharamkan minuman keras atas dirinya. Beliau tidak pernah sesekali menyentuh arak pada zaman jahiliyahnya apatah lagi setelah memeluk Islam.

v. Tidak menyembah berhala.

Beliau tidak pernah sekali pun sujud kepada berhala. Beliau pernah berkata di hadapan beberapa orang sahabat Nabi s.a.w.: "Aku tidak pernah sujud kepada berhala walaupun sekali." (Mahmud Shakir, *al-Tarikh al-Islami*, jil. 3, hlm. 31)

2. Berani menyatakan keimanan

Abu Bakar merupakan seorang lelaki yang beriman kepada Allah dan berani menyatakan keimanan tersebut secara jelas. Ketika diajak kepada Islam, beliau sama sekali tidak ragu-ragu dan bimbang untuk menerimanya. Bahkan beliau sanggup untuk menzahirkan keislamannya walaupun menyedari ancaman bahaya sedang menantinya. Inilah salah satu kualiti diri hebat yang ada padanya. Walau apa jua yang mendatang, pasti ditempuhinya tanpa rasa gundah-gulana kerana cintakan Allah dan Rasul-Nya.

3. Kaya tetapi pemurah

Walaupun mempunyai kemewahan yang melimpah ruah lantaran kepintarannya dalam perniagaan, namun ia tidak menjadikan beliau seorang yang angkuh, sombong atau bongkak. Sebaliknya harta yang dimilikinya diinfakkan untuk memperjuangkan Islam. Ketika Abu Bakar memeluk Islam, terdapat wang bernilai 40,000 dirham bersama dengannya. Wang tersebut telah diinfakkan pada jalan Allah, di samping memerdekaan hamba seperti Bilal, 'Amir bin Fuhayrah, Zunayrah dan ramai lagi. (Ibn al-Athir, *Usud al-Ghabah*, jil. 3, hlm. 325)

Sebab itulah Nabi s.a.w. mengagumi Abu Bakar sebagai sahabat yang setia ketika Baginda s.a.w. senang dan susah. Sabda Nabi s.a.w., maksudnya: "Sesungguhnya, orang yang paling berjasa kepadaiku dalam persahabatan dan hartanya ialah Abu Bakar. Seandainya aku boleh mengangkat seorang kekasih selain Tuhan-Ku, nescaya aku mengangkat Abu Bakar (sebagai kekasihku), akan tetapi (yang ada adalah) persaudaraan Islam dan kasih sayangnya." (Riwayat al-Bukhari, no. 3654 dan Muslim, no. 2382)

Baginda s.a.w. juga mengiktiraf Abu Bakar sebagai seorang yang berjasa kepadanya dan Islam, maksudnya: "Tidak seorang pun yang lebih besar jasanya

kepadaku daripada Abu Bakar. Beliau telah membantuku dengan jiwa dan hartanya." (Riwayat al-Tabarani dalam *al-Kabir*)

4. Sangat mencintai Nabi s.a.w.

Antara sahabat yang paling rapat dengan Nabi s.a.w. ialah Abu Bakar. Beliau amat menyayangi Baginda dengan kecintaan yang telah meresap ke dalam jiwa dan sanubarinya sehingga sanggup mengorbankan diri, harta dan seluruh kehidupannya untuk Nabi s.a.w.

5. Amanah dalam menjaga rahsia

Abu Bakar antara orang yang paling banyak tahu tentang Rasulullah s.a.w. Beliau sering bersama-sama Rasulullah s.a.w. dalam setiap perancangan dan tindakan. Di mana ada Nabi s.a.w., pasti di situ ada Abu Bakar. Oleh sebab itu, beliau amat memahami jiwa dan perasaan Rasulullah s.a.w.

Pemegang Rahsia Terbaik

Apabila Hafsa binti Umar menjadi janda, Umar al-Khattab telah cuba untuk memadankannya dengan beberapa orang sahabat dan antaranya Uthman bin 'Affan. Tetapi, Uthman menolaknya kerana belum bersedia untuk berkahwin.

Lalu, Umar bertemu dengan Abu Bakar dan menyatakan cadangannya. Namun, Abu Bakar berdiam diri tanpa memberikan apa-apa jawapan. Umar berasa tidak senang dengan Abu Bakar kerana sepi tanpa berita. Tidak lama selepas itu, Rasulullah s.a.w. datang melamar Hafsa. Pucuk dicita ulam mendatang, lamaran Rasulullah s.a.w. telah diterima lalu bersatuhan antara seorang Rasul dengan seorang srikanji bernama Hafsa.

Selepas itu, Abu Bakar berjumpa Umar dan memberitahu: "Mungkin engku berasa tidak senang denganku kerana tidak memberikan respons terhadap cadanganmu." Umar mengakui: "Ya."

Abu Bakar menjelaskan: "(Sebenarnya) perkara yang menghalangku untuk menjawab permintaan kamu adalah kerana aku telah mengetahui bahawa Rasulullah s.a.w. telah menyebut nyebut nama Hafsa. **Aku tidak mau membuka rahsia Rasulullah s.a.w.** Seandainya Rasulullah s.a.w. tidak menerima Hafsa, nescaya aku menerima tawaranmu." (Riwayat al-Bukhari, no. 5122)

6. Merendah diri

Abu Bakar merupakan seorang pemimpin yang sangat tawaduk. Walaupun memegang jawatan yang tinggi dalam pentadbiran, namun itu bukanlah alasan

untuk beliau tidak berkhidmat kepada masyarakat.

Sebelum menjadi khalifah, Abu Bakar selalu memerah susu untuk penduduk di sekitar tempat tinggalnya. Pada suatu hari (setelah dilantik menjadi khalifah), seorang gadis kecil telah merungut: "Tiada lagi orang yang memerahkan susu untuk kami sekarang." Rungutannya itu didengari oleh Abu Bakar, lalu beliau menjelaskan: "Tidak, demi Allah aku tetap akan memerahkan susu untuk mereka. Aku berharap agar apa yang dipikul ini tidak mengubah apa-apa pun daripada akhlakku selama ini." (*Usud al-Ghabah*, jil. 3, hlm. 325-326)

Lihatlah sikap merendah diri yang telah ditunjukkan oleh Abu Bakar. Jawatan, pangkat dan kedudukan yang tinggi bukanlah tiket untuk kita bersikap sombong dan bongkak kepada orang lain. Sebaliknya, nikmat yang diberikan itu untuk disyukuri dan bukan untuk dikufuri.

7. Takutkan Allah

Sikap takutkan Allah menyinar dari dalam diri Abu Bakar. Pada suatu hari, seorang hamba yang bekerja untuknya telah membawa pulang makanan ke rumah lalu Abu Bakar memakannya.

Hamba: "Tahukah engku apakah ia?"

Abu Bakar: "Apa?"

Hamba: "Tadi aku berlakon menjadi seorang dukun untuk seseorang, padahal aku bukanlah seorang dukun. Aku hanya menipunya, lalu dia memberikan upah kepadaiku."

Setelah mendengar jawapan hambanya, Abu Bakar terus memasukkan tangannya ke dalam mulut, lalu memuntahkan segala apa yang ada di dalam perutnya. (Riwayat al-Bukhari, no. 3842)

8. Proaktif melakukan kebaikan

Sayidina Abu Bakar adalah seorang yang sangat proaktif dalam melakukan kebaikan. Sikap ini dapat kita lihat melalui perbualannya dengan Rasulullah s.a.w.

Rasulullah: "Siapa antara kamu yang berpuasa pada hari ini?"

Abu Bakar: "Saya."

Rasulullah: "Siapa antara kamu yang menghantarkan jenazah pada hari ini?"

Abu Bakar: "Saya."

Rasulullah: "Siapa antara kamu yang



Lulusan Ijazah Sarjana Muda di Universiti Islam Antarabangsa Malaysia (UIAM) dan Ijazah Sarjana (MA) dalam bahasa Arab juga di UIAM, dan menyambung pengajian peringkat Ph.D di Universiti Malaya. Kini sebagai pensyarah di UIAM. Berpengalaman dalam bidang motivasi dan kepimpinan dan aktif dalam penerbitan buku. Boleh dihubungi di mohdazruji@gmail.com.

MOHD AZRUJI AZLEN ABD HAMID

memberi makanan kepada orang miskin pada hari ini?"

Abu Bakar: "Saya."

Rasulullah: "Siapa antara kamu yang menziarahi orang sakit pada hari ini?"

Abu Bakar: "Saya."

Rasulullah: "Semua itu tidak terkumpul pada seseorang kecuali dia akan masuk ke dalam syurga." (Riwayat Muslim, no. 1028)

9. Sentiasa membenarkan

Selepas peristiwa Israk dan Mikraj, orang Musyrikin datang kepada Abu Bakar lalu menyindir: "Kawanmu (Nabi s.a.w.) telah mengaku bahawa dia telah pergi ke Masjid al-Aqsa pada malam hari semalam, sedangkan kami menunggang unta ke sana dalam masa satu bulan." Abu Bakar lantas menjawab: "Jika Baginda berkata demikian, Baginda pasti jujur." (Ibn Kathir, *al-Bidayah wa al-Nihayah*, jil. 3, hlm. 108)

Sikap Abu Bakar yang membenarkan peristiwa yang diceritakan oleh Nabi s.a.w. telah membolehkannya menerima gelaran istimewa daripada Allah s.w.t. iaitu al-Siddiq. Ibn Hajar menyatakan dalam *al-Fath* (jil. 11, hlm. 7) bahawa ia diriwayatkan oleh al-Tabarani dan para perawinya *thiqah*.

10. Pemimpin yang bersifat magnetik

Dari sisi lain, Abu Bakar merupakan seorang pemimpin yang luar biasa. Ke pimpinannya telah mendahulukan rakyat dari segala aspek. Baginya, menjadi seorang pemimpin bukanlah untuk disanjung, sebaliknya bersedia untuk berkhidmat kepada masyarakat. Perkhidmatan yang diberikan perlulah secara adil dan saksama.

Ketika pemerintahannya, Abu Bakar telah memberi bantuan kepada rakyat secara adil. Tidak ada perbezaan antara orang merdeka dan hamba, lelaki dan perempuan serta anak kecil dan orang dewasa. Mereka semua mendapat jumlah bantuan yang sama. (Riwayat al-Bukhari, no. 3092 dan 3093)

Sikap yang ditunjukkan dalam kepimpinan menjadikannya disukai oleh rakyat. Personalitinya pula menarik orang yang mengenalinya untuk turut mempertahankan Islam.

Hanya Seorang Abu Bakar

Kini, tiada lagi Abu Bakar yang kedua. Hanya seorang Abu Bakar yang memiliki kehebatan setelah menerima tarbiah secara langsung dan tidak langsung daripada Allah dan Rasul-Nya. Namun, perkara yang boleh kita lakukan kini adalah menterjemahkan personalitinya dalam kehidupan kita. Kecemerlangan diri yang ada padanya perlu dicontoh dan diaplikasikan dalam penghayatan dan pengamalan hidup seharian. ■

Meraih Cinta-Mu

Wahai Tuhan,
yang menggenggam setiap jiwa...

Terkadang dalam meniti jalan hidup
aku rebah di pertengahan
saat aku mencari hembusan kasih
sayang
ada kalanya bahagia bertamu
terkadang makin parah sedihku
ke mana kaki hendak melangkah
jika yang tinggal hanya gelisah
tika aku makin tenggelam
apa Kau juga makin menjauh?

Mudahkan jalan agar aku kembali
meraih cinta-Mu.

Zahra Addin
Kemaman

Segelisah Mana pun Semalam

Semalam hujan meratap di rumahku
gigil dingin meresap ke sekujur tubuhku
guyur hujan membasahi laman jalanku,
di genangan air bekas hujan itu
bayang bulan menutupi wajahnya
ruang malam terkesan kecut sepi
aku terkesima hilang lelap begitu.

Allah Maha Berkuasa
pagi ini burung-burung taman
riuh melamar embun di daunan
di pucuk-pucuk rumputan
segelisah mana pun semalam
matahari terbit membawa rindu yang dalam.

Aku menyisir tirai jendela
jalur-jalur *fannun* mengcup kening
gerak angin mengembara ke jantung arif
dalam syukur lembut mentari kubiarkan
pesan kalbu kembang bertalu.

Tuhanku, cerah matahari membela lestari
segala umat dengan penuh mengerti
mengapungkan hajat kembang berseri
bumi ini perlu dikawal rapi
jangan ada lagi manusia membelit durja
membakar cakar belantara perkasa
membanjiri segala toksik menyala negeri
membunuh kehidupan sejati.

Jamaludin D.
Rimba Taqwa Sik, Kedah

